



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/646/2024-2025

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

7 հոկտեմբերի 2025թ.

ՀՀ կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող), Արամայիս Փաշինյանի և Արմեն Մարությանի (այսուհետ՝ Հանձնաժողով), 2025 թվականի հոկտեմբերի 7-ին քննելով Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգիսի Սարգսյանի կողմից 2021 թվականի գույքի, եկամուտների, ծախսերի և շահերի տարեկան հայտարարագիրը (այսուհետ՝ նաև Հայտարարագիր) «Հանրային ծառայության մասին» օրենքով սահմանված ժամկետները լրանալուց հետո՝ 30 օրվա ընթացքում, Կոռուպցիայի կանխարգելման հանձնաժողովի գրավոր ծանուցման հիման վրա չներկայացնելու համար Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 169.28-րդ հոդվածի 1-ին մասով նախատեսված վարչական իրավախախտման վերաբերյալ ՎԻՎ/646/2024-2025 գործը՝

Պ Ա Ր Զ Ե Ց

- | | | | | |
|------------------|--------------|------------|-------|----------|
| 1. Վարչական | իրավախախտման | վերաբերյալ | գործի | վարույթի |
| նախապատմությունը | | | | |

1.1 Հանձնաժողովը, իրականացնելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 2-րդ կետով վերապահված գործառույթները, էլեկտրոնային հայտարարագրերի ռեեստրի տվյալների ուսումնասիրության արդյունքներով, պարզել է, որ Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգիսի Սարգսյանի Հայտարարագիրը հանձնված և հրապարակված հայտարարագրերի ցանկում առկա չէ:

1.2 Հանձնաժողովի կողմից 2024 թվականի հունվարի 15-ին Նարեկ Սարգսյանին գրավոր ծանուցում է ուղարկվել Հայտարարագիրը չներկայացնելու վերաբերյալ, միաժամանակ առաջարկվել է ծանուցումը ստանալուց հետո՝ 30 օրվա ընթացքում, հայտարարագրման էլեկտրոնային համակարգի միջոցով ներկայացնել համապատասխան հայտարարագիրը:

Նշված ծանուցումը Նարեկ Սարգսյանի կողմից չի ստացվել և վերադարձվել է Հանձնաժողով «չպահանջված» նշումով:

1.3 Նարեկ Սարգսյանի Հայտարարագիր ներկայացնելու պարտականության վերաբերյալ ծանուցումը 2024 թվականի սեպտեմբերի 19-ին թիվ 01/2974-2024 գրությամբ ուղարկվել է ՀՀ Ներքին գործերի նախարարին՝ խնդրելով փոխօգնության կարգով ծանուցումը տրամադրել Նարեկ Սարգսյանին: Նշված ծանուցումը Նարեկ Սարգսյանին է հանձնվել 2024 թվականի հոկտեմբերի 8-ին, սակայն վերջինս «Հանրային ծառայության մասին» օրենքով (այսուհետ՝ Օրենք) սահմանված ժամկետում, ինչպես նաև դրանից հետո՝ 30 օրվա ընթացքում Հայտարարագիրը չի ներկայացրել Հանձնաժողով:

1.4 2024 թվականի նոյեմբերի 8-ին պատշաճ ծանուցված Նարեկ Սարգսյանի բացակայությամբ կազմվել է թիվ ՎԻՎ 731/24 արձանագրությունը՝ Օրենսգրքի 169.28-րդ հոդվածի 1-ին մասով նախատեսված իրավախախտման հատկանիշներով:

1.5 Հանձնաժողովի կողմից 2025 թվականի ապրիլի 10-ին Նարեկ Սարգսյանին է հասցեագրվել թիվ 01/1497/10-2025 գրությունը՝ հրավիրելով գրությունը ստանալուց հետո՝ 3-րդ աշխատանքային օրը՝ ժամը 11:30-ին ներկայանալ Հանձնաժողով՝ վարչական իրավախախտման վերաբերյալ գործի քննությանը մասնակցելու նպատակով:

Նշված ծանուցումը Նարեկ Սարգսյանն ստացել է 2025 թվականի ապրիլի 17-ին (հիմք՝ ALO127475993AM անդորրագիրը):

1.6 Հանձնաժողովը, հիմք ընդունելով «Վարչարարության հիմունքների և վարչական վարույթի մասին» օրենքի 49-րդ հոդվածի 2-րդ մասի «ա» կետի կարգավորումները՝ 2025 թվականի ապրիլի 15-ի, հուլիսի 31-ի և օգոստոսի 29-ին թիվ ՎԻՎ/646/2024-2025-1, ՎԻՎ/646/2024-2025-2 և ՎԻՎ/646/2024-2025-3 որոշումներով վարչական իրավախախտման վերաբերյալ գործի վարույթը կասեցրել է՝ վարույթին առնչվող որոշ կարևոր հանգամանքներ վարույթի մասնակցից պարզելու համար:

1.7 Սույն վարչական վարույթի շրջանակում Հանձնաժողովը ձեռնարկել է անհրաժեշտ միջոցներ՝ պարզելու և գնահատելու վարույթի մասնակցի կողմից Հայտարարագիր չներկայացնելու պատճառ հանդիսացած հանգամանքները՝ վարույթի փաստական հանգամանքներն ամբողջական և օբյեկտիվ պարզելու նպատակով:

Վարույթի մասնակցի հետ ունեցած հեռախոսային հաղորդակցության ընթացքում վերջինս տեղեկացրել է, որ հայտարարագիրը չի կարող լրացնել, քանի որ առկա են որոշ տվյալներ, որոնք ներկայումս չի հիշում կամ չունի դրանց վերաբերյալ տեղեկատվություն, ուստի չի կարող ներկայացնել Հայտարարագիրը:

Հիմք ընդունելով վերոգրյալը՝ Հանձնաժողովը վերսկսել է թիվ ՎԻՎ/646/2024-2025 վարույթը և 2025 թվականի հոկտեմբերի 7-ին նշանակել վարչական իրավախախտման վերաբերյալ գործի քննություն:

1.8 Հանձնաժողովի կողմից 2025 թվականի սեպտեմբերի 19-ին Նարեկ Սարգսյանին է հասցեագրվել թիվ 01/3369-2025 գրությունը՝ առաջարկելով 2025 թվականի հոկտեմբերի 7-ին՝ ժամը 15:00-ին, ներկայանալ Հանձնաժողով՝ վարչական իրավախախտման վերաբերյալ գործի քննությանը մասնակցելու նպատակով:

Նշված ծանուցումը Նարեկ Սարգսյանը ստացել է 2025 թվականի սեպտեմբերի 23-ին (հիմք՝ ALO129659473AM անդորրագիրը):

1.9 2025 թվականի հոկտեմբերի 7-ին վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Նարեկ Սարգսյանի

բացակայությամբ տեղի է ունեցել վարչական իրավախախտման վերաբերյալ գործի քննություն:

2. Վարույթի մասնակցի ներկայացրած դիրքորոշումները ու պարզաբանումները

Վարույթի մասնակցի հետ ունեցած հեռախոսային հաղորդակցության ընթացքում վերջինս տեղեկացրել է, որ հայտարարագիրը չի կարող լրացնել, քանի որ առկա են որոշ տվյալներ, որոնք ներկայումս չի հիշում կամ չունի դրանց վերաբերյալ տեղեկատվություն, ուստի չի կարող ներկայացնել Հայտարարագիրը:

3. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/646/2024-2025 գործում առկա նյութերը, կատարել հանգամանքների քննություն, որի արդյունքում հաստատված է համարում, որ՝

3.1 Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգիսի Սարգսյանի կողմից «Հանրային ծառայության մասին» օրենքով նախատեսված 2021 թվականի գույքի, եկամուտների, ծախսերի և շահերի տարեկան հայտարարագիրը «Հանրային ծառայության մասին» օրենքով սահմանված ժամկետը լրանալուց հետո՝ 30 օրվա ընթացքում, Հանձնաժողովի գրավոր ծանուցման հիման վրա չի ներկայացվել Հանձնաժողով:

3.2 Գործի քննության օրվա դրությամբ Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգիսի Սարգսյանի կողմից Հայտարարագիրը չի ներկայացվել Հանձնաժողով:

3.3 Վարչական վարույթի ընթացքում Նարեկ Սարգիսի Սարգսյանի կողմից Հանձնաժողով դիրքորոշում չի ներկայացվել:

4. Որոշումն ընդունելու իրավական հիմքերը և հիմնավորումները

4.1 Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգիսի Սարգսյանը Օրենքի 34-րդ հոդվածով սահմանված կարգավորումների համաձայն՝

հանդիսացել է գույքի, եկամուտների, ծախսերի և շահերի հայտարարագիր ներկայացնելու պարտականություն ունեցող անձ:

4.2 Օրենքի 36-րդ հոդվածի 1-ին մասի համաձայն՝ հայտարարատու պաշտոնատար անձինք պաշտոնավարման ընթացքում տարեկան հայտարարագրերը ներկայացնում են մինչև տվյալ տարվան հաջորդող տարվա մայիսի 31-ը:

4.3 Օրենսգրքի 169.28-րդ հոդվածի 1-ին մասի համաձայն՝ «Հանրային ծառայության մասին» օրենքով սահմանված՝ հայտարարագիր ներկայացնելու պարտականություն ունեցող անձի կողմից «Հանրային ծառայության մասին» օրենքով նախատեսված **հայտարարագրերը «Հանրային ծառայության մասին» օրենքով սահմանված ժամկետները լրանալուց հետո՝ 30 օրվա ընթացքում, Կոռուպցիայի կանխարգելման հանձնաժողովի գրավոր ծանուցման հիման վրա չներկայացնելը** առաջացնում է տուգանքի նշանակում՝ սահմանված նվազագույն աշխատավարձի երկուհարյուրապատիկի չափով:

4.4 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 6-րդ կետի համաձայն՝ Հանձնաժողովը քննում և լուծում է հայտարարագրմանն առնչվող խախտումների վերաբերյալ գործեր:

4.5 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.6 «Վարչարարության հիմունքների և վարչական վարույթի մասին» ՀՀ օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝

բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.7 «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի 2-րդ մասի «ա» կետի համաձայն՝ Վարչական մարմինը կարող է կասեցնել վարչական վարույթը, եթե՝ վարչական ակտի հասցեատերը բացակայում է, և վարչական մարմինը, նախքան վարչական ակտ ընդունելը, անհրաժեշտ է համարում նրա ներկայությունը՝ վարույթին առնչվող որոշ կարևոր հանգամանքներ նրանից պարզելու համար:

Նույն հոդվածի 3-րդ մասի համաձայն՝ սույն հոդվածի 2-րդ մասով նախատեսված դեպքերում վարչական վարույթը վերսկսվում է դրա կասեցման հիմք դարձած հանգամանքները վերանալուց հետո, բայց ոչ ուշ, քան կասեցման մասին որոշում ընդունելու օրվանից հետո 60 օրը լրանալը:

4.8 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.9 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.10 Օրենսգրքի 244.17-րդ հոդվածի համաձայն՝ Օրենսգրքի 169.28-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.11 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.12 Օրենսգրքի 267-րդ հոդվածի համաձայն՝ վարչական իրավախախտման վերաբերյալ գործը քննվում է վարչական պատասխանատվության ենթարկվող անձի ներկայությամբ: Գործը կարող է այդ անձի բացակայությամբ քննվել միայն այն դեպքերում, երբ տվյալներ կան գործի քննության տեղի և ժամանակի մասին նրան ժամանակին ծանուցելու վերաբերյալ և եթե նրանից միջնորդություն չի ստացվել գործի քննությունը հետաձգելու մասին:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովը արձանագրում է, որ Գեղարքունիքի մարզի Ծովագյուղ համայնքի ղեկավարի տեղակալ Նարեկ Սարգսի Սարգսյանը «Հանրային ծառայության մասին» օրենքով նախատեսված 2021 թվականի գույքի, եկամուտների, ծախսերի և շահերի հայտարարագիրը «Հանրային ծառայության մասին» օրենքով սահմանված ժամկետը լրանալուց հետո՝ 30 օրվա ընթացքում, Հանձնաժողովի գրավոր ծանուցման հիման վրա Հանձնաժողով չի ներկայացրել, այն է՝ թույլ է տվել Օրենսգրքի 169.28-րդ հոդվածի 1-ին մասով նախատեսված զանցանք:

Հանձնաժողովը գտնում է, որ խախտման հիմքով պատասխանատվություն սահմանելու հարցը որոշելու համար անհրաժեշտ է յուրաքանչյուր գործով գնահատել, արդյոք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյոք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս չի պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ: Սույն դեպքում, Օրենսդրի կողմից սահմանված պահանջների կատարումը նպատակ ունի ապահովել հայտարարատու անձի հանրային հաշվետվողականությունը, վերջինիս հանրային գործունեության նկատմամբ վստահությունը, պետական պաշտոն զբաղեցնող անձի գործունեության թափանցիկությունը և հնարավոր կոռուպցիոն ռիսկերից զերծ գործունեությունը, որը տվյալ դեպքում խաթարվել է՝ Նարեկ Սարգսյանի կողմից Հայտարարագիր չներկայացնելու արդյունքում՝ մասնավորապես, Հայտարարագիր չներկայացնելու արդյունքում

պաշտոնատար անձի ընդհանուր գույքային դրությունը, շահերի բախման հնարավոր իրավիճակները Հանձնաժողովին և հանրությանը հասանելի չի դարձել, այդպիսով չի ապահովվել պաշտոնատար անձի գործունեության թափանցիկությունն ու նրա հաշվետվողականությունը:

Անդրադառնալով վարույթի մասնակցի կողմից հեռախոսազանգի միջոցով ներկայացված պարզաբանմանը, համաձայն որի՝ վերջինս չի կարող ներկայացնել հայտարարագիրը, քանի որ չի հիշում հայտարարագրման ենթակա որոշ տվյալներ՝ Հանձնաժողովը կարևոր է համարում նշել, որ հայտարարատու պաշտոնատար անձի կողմից Օրենքով սահմանված հայտարարագիր ներկայացնելու պարտականությունը կրում է իմպերատիվ բնույթ:

Միաժամանակ, Հանձնաժողովը կարևոր է համարում նշել, որ Օրենսդիրը հայտարարագիր ներկայացնելու համար հստակ ժամկետ է սահմանել, որի նպատակը հայտարարատուի կողմից օրենքով սահմանված պարտականության պատշաճ և ժամանակին կատարումն ապահովելն է: Այսպիսով, հայտարարագրման ենթակա տվյալները չհիշելու հանգամանքը չի կարող դիտարկվել որպես հայտարարագիր չներկայացնելու օբյեկտիվ պատճառ, քանի որ հայտարարատուն պարտավոր էր ձեռնարկել անհրաժեշտ միջոցներ՝ հայտարարագրման համար անհրաժեշտ տեղեկատվությունը նախապես ճշտելու և սահմանված ժամկետում հայտարարագիրը ներկայացնելու համար:

Ուստի, հայտարարատու պաշտոնատար անձը պարտավոր է ապահովել հայտարարագրի ներկայացումը՝ անհրաժեշտության դեպքում ձեռնարկելով օրինական միջոցներ համապատասխան տվյալների ճշգրտման ուղղությամբ: Հետևաբար, Նարեկ Սարգսյանի կողմից ներկայացված պարզաբանումը չի կարող հիմնավոր համարվել:

Հաշվի առնելով վերոգրյալը՝ Հանձնաժողովը գտնում է, որ Նարեկ Սարգսյանն ենթակա է վարչական պատասխանատվության Օրենսգրքի 169.28-րդ հոդվածի 1-ին մասով նախատեսված զանցանքի համար:

Հանձնաժողովը գտնում է, որ սույն գործով առկա չէ Օրենսգրքի 34-րդ հոդվածով նախատեսված վարչական իրավախախտման համար պատասխանատվությունը

ծանրացնող, ինչպես նաև 33-րդ հոդվածով նախատեսված վարչական իրավախախտման համար պատասխանատվությունը մեղմացնող որևէ հանգամանք:

Ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 6-րդ կետով, 26-րդ հոդվածով, Վարչական իրավախախտումների վերաբերյալ ՀՀ օրենսգրքի 169.28-րդ հոդվածի 1-ին մասով՝ Հանձնաժողովը.

Ո Ր Ո Շ Ե Ց

1. «Հանրային ծառայության մասին» օրենքով նախատեսված պաշտոնատար անձի 2021 թվականի գույքի, եկամուտների, ծախսերի և շահերի հայտարարագիրը «Հանրային ծառայության մասին» օրենքով սահմանված ժամկետը լրանալուց հետո՝ 30 օրվա ընթացքում, Հանձնաժողովի գրավոր ծանուցման հիման վրա չներկայացնելու համար Նարեկ Սարգիսի Սարգսյանի նկատմամբ կիրառել վարչական տույժ սահմանված նվազագույն աշխատավարձի երկուհարյուրապատիկի՝ **200 000 (երկու հարյուր հազար) ՀՀ դրամի չափով:**

2. Տուգանքը պետք է վճարվի գանձապետական **900005001335** «Իրավախախտումների համար կիրառվող վարչական տուգանքներ և պատժամիջոցներ» **հաշվեհամարին՝** վճարման անդորրագրի «նպատակ» դաշտում պարտադիր նշելով սույն որոշման համարը:

3. Սույն որոշումն ուժի մեջ է մտնում այն սահմանված կարգով Նարեկ Սարգիսի Սարգսյանին հանձնելու (հանձնված համարվելու) հաջորդող օրվանից:

4. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՅԱՆ